

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. चशोती किश्तवाड़ च बद्दल फट्टने कारण आई दी खतरनाक करोपी च मरोने आहलें दी गिनतरी 62 तोड़ी पुज्जी। फौज नै राहत ते बचाऽ कम्में च तेजी आहनने लेई बैले पुल तैयार करी लैता।
2. उपमुख्यमंत्री सुरिंद्र चौधरी होरें राहत कैंपें ते अस्पतालें दा दौरा लाया, प्रभावित परोआरें गी हर चाल्ली दी मदद दा भरोसा दोआया।
3. जल शक्ति मंत्री जावेद राणा होरें पुंछ जिले च बटीधार मेंढर च बनाए जा'रदे सिन्थेटिक एथलेटिक ट्रैक दे कम्मे दा निरीक्षण कीता।
4. भारी बरखें दे चलदे बने दे असुरक्षित हालात गी ध्यानै च रखदे होई जम्मू संभाग दे सब्बै स्कूल अज्ज बी बंद रक्खे गेदे न।
5. सरकारै, प्रशासन ते आम लोकें गी मौसम विभाग दी चेतावनी गी ध्यानै च रखदे होई मता सौहगा-सतर्क रौहने लेई आखेआ गेआ ऐ।

<><><><><><>

Chasoti-Death Toll

किश्तवाड़ जिले दे चशौती ग्रांs च बद्दल फट्टने मगरा कल 5में रोज बी मलबे हेठ दबोए दे लोकेँ गी कड्डने दा कम्म बरोबर जारी रेआ। पिछले हफ्ते होई दी इस कुदरती करोपी करी प्रभावित होए दे लोकेँ गी प्रशासन आसेआ हर चाल्ली दी मदाद उपलब्ध करोआई जा'रदी ऐ। आकाशवाणी दे जम्मू संवाददाता नै जानकारी दिती ऐ जे मरने आहलें दी गिनतरी 62 पुज्जी गेई ऐ जिल्ले के पुलस आसेआ दिती गेदी जानकारी मताबक 41 लोक अजें बी लापता न। जम्मू-कश्मीर विधानसभा च विपक्ष दे नेता सुनील शर्मा जेड़े जम्मू दे डिविजनल कमिशनर ते आई.जी.पी जम्मू हुंदे सने घटना आहली थाहरा पर मौजूद न। उनें आखेआ जे एह कुदरती करोपी कन्नै बड़ा मता नुकसान पुज्जा ऐ।

<><><><><><>

Dy CM- Kathua Visit

उपमुख्यमंत्री सुरिंदर चौधरी होरें जंदे रोज कठुआ के सिडको घाटी औद्योगिक क्षेत्र च स्थापित राहत शिविरें दा दौरा लाया ते हाल च गै बद्दल फट्टने कन्नै प्रभावित परौआरें आस्तै कीती जा'रदी बवस्थाएं दा जायजा लैता। उपमुख्यमंत्री होरें विस्थापित परौआरें कन्नै गल्लबात कीती ते उनें गी आवा'रदिएं परेशानिएं गी सुनदे होई उनेंगी हर मुमकन मदद देने दा यकीन दोआया। चौधरी होरें राहत शिविर च पीड़ितें कन्नै गल्ल करदे होई आखेआ जे संकट दी इस घड़ी च सरकार प्रभावित परौआरें कन्नै शाना बशाना खड़ोती दी ऐ ते उनेंगी राहत ते पुनर्वास सुनिश्चित करने आस्तै सब्बै लोड़चदे उपाs कीते जाडन। उपमुख्यमंत्री होरें सैन्य अस्पताल पठानकोट ते

गौरमेंट मेडिकल कॉलेज कठुआ दा बी दौरा कीता बादल फट्टने दे बाद उत्थे भर्ती घायलें दी डोल पुच्छी। पत्रकारें कन्नै गल्ल करदे होई उपमुख्यमंत्री होरें आखेआ।

<><><><><><>

Rana Synthetic Track

जल शक्ति मंत्री जावेद अहमद राणा होरें पुंछ जिले दे मेंडर च बटिधार थाहर बनाए जा'रदे सिंथेटिक एथलेटिक ट्रैक दा निरीक्षण कीता। एह् ढांचागत प्रोजेक्ट 6 करोड़ रुपें दी लागत कन्नै बनाया जा'रदा ऐ। दौरें दरान अधिकारियें, मंत्री होरें गी जानकारी दिती जे 40 फीसद निर्माण कम्म पूरा होई गेआ ऐ। एहदे पर संदोख बुज्झदे होई मंत्री होरें इस गल्लै पर जोर पाया जे बकाया रेही गेदे कम्में गी बी तय समें-सीमा दे अंदर-अंदर पूरा कीता जाना लोड़चदा। मंत्री होरें कम्मै दी रफ्तार च तेजी आहनने दे कन्नोकन्नी उच्चा म्यार बनाई रखने पर बी जोर दिता। एहदे अलावा राणा होरें मौके पर अतिरिक्त सहायक ढांचे दी शुरूआत बारै बी घोषणा कीती।

<><><><><><>

DC Jammu NH Review

जम्मू दे डिप्टी कमिशनर राकेश मिन्हास होरें कल जम्मू-अखनूर राश्ट्रीय राजमार्ग परियोजना दी समीक्षा कीती। उन्नै पैकेज-1, पैकेज-2, पैकेज-3-बी तैहत भगवती नगर, गणेश बिहार, मुट्ठी, दोमाना, अम्बरां, चक सिंगा ते हुनमान चौक पर चला-रदे कम्में दा जायजा लैता। डी.सी होरें कम्में दी रफ्तार च तेजी आहनने दे निर्देश दिते। उन्नै परियोजना गी समें सिर पूरा करने लेई

प्रशासन आसेआ पूरी चाल्ली मदाद देने दा भरोसा बी दोआया। बकाया रेदे कम्में लेई 8 म्हीने दी समें-सीमा तय कीती गई ऐ।

<><><><><><>

JMC

जम्मू नगर निगम नै इक विशेष अभियान रम्भेआ ऐ जेदे तैहत समूलचे शैहरा दी गलियें च लग्गी दी लाइटें गी दुरुस्त करने दे कन्नोन्नी जित्थे लोड़ ऐ होर लाइटां लाइयां जा'रदियां न। इस पहलकदमी दा मकसद ऐ जे जम्मू शैहरा च हर गली-शिड़क ते लोके दे खड़ोने-बौहने आहली थाहरें गी लाइटां लाइयें रोशन कीता जा तां जे सुरक्षा यकीनी बनी सकें ते अपराधें ते गैर कन्नी कम्में दी संभावना गी घट्ट कीता जाई सकें। जमीनी सतह पर इस गेंs दी कारकरदगी दी समीक्षा करदे होई जेएमसी कमिशनर डॉ. देवांश यादव होरें कल रूप नगर च गली आहली लाइटां ठीक करने आहले कैंप दा दौरा कीता। कैंप च साबका कांसलरें, मकामी बसनीकें ते सामुदायिक लीडरें दी सक्रियता कन्नै भागीदारी दिक्खने गी लब्बा'रदी ऐ। मीडिया आहलें गी संबोधित करदे होई जेएमसी कमिशनर डॉ. देवांश यादव होरें आखेआ।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता

च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौंहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

School Closed

खराब मौसम आहले हालात दे चलदे स्कूली शिक्षा निदेशालय नै अज्ज जम्मू खिते दे सारे निजी ते सरकारी स्कूल बंद रक्खने दा हुकम जारी कीता ऐ। एह गें विद्यार्थियें दी सुरक्षा गी यकीनी बनाने लेई पुट्टी गेई ऐ। मौसम विभाग नै 19 अगस्त तगर मौसम खराब रौहने दी पेशगोई कीती दी ऐ, जेदे मद्देनजर एह फैसला कीता गया।

<><><><><><>

MET

मौसम विभाग आसेआ औंदे किश दिनें दरान जम्मू-कश्मीर दे बक्ख-बक्ख जिलें च भारी बरखें, चानचक्क हाड़, ल्हास पस्सियं पौने ते होर कुदरती करोपियें बारै खबरदार कीते जाने पर सरकार नै प्रशासन ते लोकें गी अलर्ट पर रक्खे दा ऐ। आकाशवाणी दे जम्मू संवाददाता नै जानकारी दिती ऐ जे मौसम दी चेतावनी मगरा सरकार नै डिप्टी कमिशनरें, आला अधिकारियें, इंजीनियरें

ते कर्मचारियें गी पूरे तरीके कन्नै तैयार रौहने दे निर्देश दिते न। जिला प्रशासनें गी आखेआ गेआ ऐ जे ओह राहत शिविरें गी तैयार करन ते जरूरी सहूलतां जिआं जे दोआइयां, खाने-पीने आहली चीजां ते पीने आहला पानी बगैरा दी बवस्था गी यकीनी बनान।

<><><><><><>

DC Doda Library

डोडा दे डिप्टी कमिशनर हरविंद्र सिंह होरें जीएमसी डोडा कश मंदर गली नगरी च Knowledge Nexus Library नांs दे इक पुस्तकालय दा उद्घाटन कीता। नमी बनाई गेदी इस लाइब्रेरी च विद्यार्थियें आस्तै सब्बै जरूरी सहूलतां उपलब्ध न जिंदे च बैठने आस्तै अरामदायी सीटां, पढ़ने आस्तै बक्खरे डेस्क, मुफ्त वाई.फाई, फोन गी चार्ज करने लेई प्वाइंट, शौचालय, कताबां, मैगजीनां, धार्मिक कताबां ते कैंटीन दी बवस्था शामिल ऐ। डी.सी होरें आखेआ जे एह लाइब्रेरी ज्ञान ते शोध दा इक केंद्र बनियै उभरोग जेदे नै विद्यार्थियें गी शोधकर्ताएं ते पढ़ने आहलें गी बड़ा मता फायदा होग। इस मौके पर बोलदे होई उनें आखेआ।

<><><><><><>

Ramban-PMFME

खाने-पीने आहले समेयान गी डब्बा बंद करने आहले भलेआं लौहके उद्यमें गी बढ़ावा देने दी गर्ज कन्नै शुरू कीती गेदी योजना यानि PMFME स्कीम गी मैहकमा राई-बाई रामबन जिले च बी मता प्रोत्साहन दिता जा'रदा ऐ। इस स्कीम तैहत पैहले थमां कम्म करा'रदे ते नमें उद्यमें गी माली, कारोबार ते तकनीकी मदद उपलब्ध कराना ऐ। एहदे तैहत इक प्रोजेक्ट गी 35

प्रतिशत तोड़ी दी सब्सिडी बद्दोबद्द 10 लक्ख रुपे फी युनिट साब्बै उपलब्ध कराई जंदी ऐ।
एहदे च व्यक्तिगत ते सामूहिक उद्यम बी शामिल होई सकदे न यानि कुसै इक व्यक्ति आसेआ
शुरू कीता गेदा प्रोजेक्ट या इक कोला मते लोकें आसेआ मिलियै शुरू कीती गेदी कोई इकाई।
इस बारै आकाशवाणी समाचार कन्नै गल्ल करदे होई रामबन दे एरिया मार्केटिंग अधिकारी कृषि
विभाग तहसीन इकबाल चिब होरें आखेआ।

<><><><><><>